

ARUBA ,... Honduras mester di nos awe

Dia 13 di Februari 1953, mi ta corda aki riba e "Grote Overstroming" na Hulanda, y con Aruba completo a drenta den accion, y a yuda damnificadonan di Hulanda cu miles di florin na paña, comestible, remedi etc. durante e accion di yudanza di mas grandi cu a yega di wordo organiza riba nos isla.

Pa añanan largo, durante Tele-ton di ARSCA mi tabata pidi pa donacion pa nos yuda nos prohimonan y Aruba tabata coopera cu 50 te 100 mil florin den cada Tele-ton.

E aña aki, Aruba a habri braza pa Fundacion Sheila Maduro y danki na esaki, Sheila awe casi por biba un bida normal atrobe combina cu su fe grandi di un dia por cana atrobe y ta 100 por ciento.

Awe, mi ta haci un yamada na GOBIERNO na prome lugar, y despues na instancianan CARITATIVO, pa ARUBA DUNA HONDURAS un man. HONDURAS MESTER DI ARUBA AWE.

Pone man na obra for di awe, lanta un Comision Nacional "ARUBA cu HONDURAS" coordina por ehemplo pa Cruz Corra y laga nos cuminsa colecta, colecta y colecta pa yuda e pais aki.

HONDURAS TA PIDI MUNDO YUDANZA

Esnan cu a mira television ayera por a mira e situacion tristo cu Honduras ta pasando aden.

Por a mira President CARLOS FLORES implorando "Pueblonan di mundo, yuda Honduras".

Aruba ta un PUEBLO DI MUNDO y laga nos yuda cu loke nos por, pero LAGA NOS YUDA.

Si lesa e articulo den noticia internacional riba Honduras, por haya un idea masha chiquito di e sufrimento, y si a mira e programa na Television cu reportahenan for di Honduras, bo ta puntra bo mes: "Con mi por come, y hasta gasta cuminda, mirando e criaturanan muriendo mi dilanti.. Muchanan, hendenan grandi sin paña riba nan curpa. Babynan sin un tiki lechi pa nan sobrevivencia".

Si a mira e programa por a mira con manera "bitchi" ta rescata hende for di situacionnan masha precario cu nan ta aden. Miles di mucha, hende muher, anciano y anciananan, mara na mara un siman caba, sin awa y sin cuminda sperando pa wordo rescata.

Por a mira imagennan conmovedor di escenan repeti di un lugar pa otro con mamanan ta baha di lanchanan, semi sunu, cu nan yiunan den braza, mientras e mama y tambe a yiunan casi no por cana di debil cu nan ta, no por mantene nan mes riba pia.

Esaki por a mira por ehemplo na San Pedro de Sula y na cantidad di pueblo den su cercania.

Por a mira con periodistanan ta trata di papia cu tatanan di familia cu a logra sali cu nan yiunan for di zonanan devasta, y cu no por a habri boca bisa un palabra.

Lo unico cu tabata sali ta yoramento como unico manera di deshoga nan mes pa a tapa nan desgracia.

Miles di hende cu ayera a cumpli 8 dia di supervivencia riba daknan di nan ranchonan o den matanan, cansa, debil, y ora cu rescate yega no

por ni los nan curpa.

Otronan no tabata tin forza ni pa bula na awa pa bay lancha, mientras cu tabata tin otronan cu ta baha di mata, cay den awa hoga mes ora. Por a mira decenas y decenas di mucha canando na lugarnan poco seco, sin paña riba nan curpa y sin cu nan por a come un siman largo y sin por a bebe awa.

Na e region Choluleca zuidoost di e pais tin 5000 hende atrapa debi na inundacionnan sperando riba asistencia "y den caso contrario, tur lo muri", esta si no yega asistencia pa caba.

President di Honduras a implora mundo ayera pa yuda su pais y mi ta kere cu nos na Aruba, aunke con chiquito nos ta, y aunke nos no tin e relacion cu e pais aki riba e diferente terenonan, toch por mustra nos grandeza y yuda.

"Mi ta haci un yamada angustioso y urgente na gobiernonan y organismonan di socoro rond mundo, pa yuda Honduras den e SOS cu nos ta aden", e mandatario hondureño a implora.

HENTER E PAIS DEN SITUACION DI DESASTER

Pueblonan y cantonnan completo a desaparece di mapa na Honduras. Municipionan di e pais a cuminsa sinti escases di cuminda y di awa pa bebe, capital di e pais mes ta den situacion di desaster y calamidad, segun e president a bisa.

Por a mira na television di hendenan 5 pa 8 dia riba dak di cas sin cuminda sperando unidadnan di rescate.

Henter e pais ta den un panorama di morto, desolacion y ruina y esaki lo sigui aumenta mientras no tin yudanza y cu ainda tambe tin lugarnan aïsla cu no por yega.

Por a mira ayera cadavernan tur caminda, victima di hogamento, di desgracianan, inundacionnan, derumbenan etc.

Den lugarnan di refugio tin mas di mey miyon damnificado y un componente masha halto di muchanan di edad tierno.

LAGA NOS NO WARDA Y ACTUA AWE

Locual tin skirbi aki ta djies un gota di e sufrimento cu tin den e pais, y Aruba por yuda SI ARUBA KIER YUDA. Awe nan mester di nos y aunke nos lo no desea esaki, lo por yega un dia cu ta NOS MESTER DI YUDANZA INTERNACIONAL.

Mi ta termina cu palabranan di e president di Honduras durante su transmision nacional na radio y television ayera, y mi ta cita: "Nos ta yora y dera nos mortonan cu tur dignidad, despues nos ta bay seca nos lagrimanan. Contra biento, orcan y marea, nos tin cu sigui biba, patrianan no tin duplicado, y nos no por cumpra esaki den tiendan, nan mester wordo construi y sigui wordo construi mil vez si mester. E cantidad di mortonan no ta wordo estima na "centenares" pero na "miles" aunke ainda no por precisa e cifra exacto.

July

Accion riba tereno di Radisson



ORANJESTAD (AAN): Dialuna merdia tabatin un tipo di accion riba tereno di Radisson, como cu un grupo grandi di trahador ta wardando pa dos quicena caba riba nan pago.

Pues, pa mas di 30 dia caba nan ta wardando riba nan placa, y keto bay nada. Pa tal motibo, riba conseho di supervisor nan a bay para pafor pa asina expresa nan malcon-

tento. Entre nan, DIARIO a nota cu un trahador cu a accidenta durante e recien derumbe di piso, tambe ta laborando, no obstante cu su braza ta den gips.

